

OUDITEUR-GENERAAL VAN SUID-AFRIKA**NO. 443****01 APRIL 2020****Wet op Openbare Oudit, 2004 (Wet No. 25 van 2004):
Regulasies op Ouditfooi**

Ek, Thembekile Makwetu, Ouditeur-Generaal van Suid-Afrika, het ingevolge artikel 52(1) van die Wet op Openbare Oudit, 2004 (Wet No. 25 van 2004), saamgelees met artikels 13 en 23 van die Wet, die regulasies uitgevaardig wat in die bylae uiteengesit is.

BYLAE**Inhoudsopgawe****Regulasies**

1. Kort titel
2. Woordomsrywings
3. Proses om met Nasionale Tesourie te beraadslaag oor basis vir vasstelling van ouditfooi asook oor frekwensie, aard en omvang van oudits
4. Kennisgewing aan Nasionale Tesourie deur Ouditeur-Generaal oor wanbesteding van ouditfooi deur geouditeerde
5. Voorlegging deur Ouditeur-Generaal op tesourie se voorgestelde direktief om ouditfooi vanaf begroting te bestry
6. Kennisgewing aan Ouditeur-Generaal deur Nasionale Tesourie ten opsigte van geouditeerde wat finansiële engte ondervind om ouditfooi-oorskot te betaal
7. Publikasie van ooreenkoms

Kort titel

1. Hierdie regulasies is die Regulasies oor Ouditfooië.

Woordomskrywings

2. In hierdie regulasies het 'n woord waaraan 'n betekenis in die Wet op Openbare Oudit, 2004 (Wet No. 25 van 2004) geheg word, daardie betekenis, en tensy uit die samehang anders blyk, beteken —

"**skriftelik**" sluit enige elektroniese middele in wat deur die Wet op Elektroniese Kommunikasie en Transaksies, 2002 (Wet No. 25 van 2002) gemagtig word, en "geskrewe" het 'n soortgelyke betekenis; en

"**Wet**" die Wet op Openbare Oudit, 2004.

Proses om met Nasionale Tesourie te beraadslaag oor basis vir vasstelling van ouditfooië asook oor frekwensie, aard en omvang van oudits

3. (1) Die Ouditeur-Generaal moet ingevolge subregulasies (2) en (3) die Nasionale Tesourie uitnooi om aan hom of haar voorleggings ten opsigte van die finansiële jaar beginnende op 1 April van die volgende jaar te maak —

- (a) met betrekking tot die frekwensie, aard en omvang van oudits waarna in artikel 11 van die Wet verwys word, jaarliks teen die eerste dag van Julie; en
- (b) wanneer hy of sy dit nodig mag ag, met betrekking tot die basis vir die berekening van ouditfooië wat van geouditeerdes ten opsigte van oudits waarna in artikel 11 van die Wet verwys word, verhaal moet word.

- (2) Vir doeleindes van die aangeleenthede in subregulasie (1)(a) beoog, moet die Ouditeur-Generaal die Nasionale Tesourie van tersaaklike inligting voorsien, wat die volgende kan insluit:

- (a) inligting aangaande die frekwensie, aard en omvang van oudits waarna in artikel 11 van die Wet verwys word wat hy of sy beoog om te bepaal;
- (b) inligting aangaande die verskillende kategorieë van oudits wat die Ouditeur-Generaal beoog om vir doeleindes van artikel 13(3)(a) van die Wet te bepaal, indien enige;
- (c) inligting aangaande enige spesifieke direktiewe wat die Ouditeur-Generaal beoog om ten opsigte van enige spesifieke aangeleentheid vir doeleindes van artikel 13(3)(b) van die Wet, uit te vaardig, indien enige;

- (d) die lys van geouditeerdes, deur die Ouditeur-Generaal ingevolge artikel 23(6) van die Wet geïdentifiseer, wie se ouditfooi een persent van die totale lopende en kapitale besteding van sodanige geouditeerde vir die tersaaklike finansiële jaar oorskry;
 - (e) die Ouditeur-Generaal se mening ten opsigte van 'n geouditeerde se vermoë om sy ouditfooi te vereffen;
 - (f) die motivering onderliggend aan die Ouditeur-Generaal se voorgestelde vasstellings.
- (3) Vir doeleindes van die aangeleenthede beoog in subregulasie (1)(b), moet die Ouditeur-Generaal die Nasionale Tesourie van toepaslike inligting voorsien, insluitende 'n konsep van die dokument waarin besonderhede verstrekkend word van die basis vir die berekening van ouditfooi wat verhaal moet word van geouditeerdes, ten opsigte van oudits waarna in artikel 11 van die Wet verwys word.
- (4) Die Nasionale Tesourie moet sy voorlegging, indien enige, aan die Ouditeur-Generaal maak –
- (a) ten opsigte van die aangeleenthede beoog in subregulasie (1)(a), teen die eerste dag van elke Augustus;
 - (b) ten opsigte van die aangeleenthede beoog in subregulasie (1)(b), teen die datum deur die Ouditeur-Generaal bepaal.
- (5) Indien die Nasionale Tesourie geen voorlegging soos beoog in subregulasie (4) gemaak het nie, moet die Ouditeur-Generaal met sy of haar vasstelling voortgaan op die basis dat die Nasionale Tesourie geen beswaar teen die voorgestelde vasstelling het nie.
- (6) Die Ouditeur-Generaal kan slegs beraadslaag met die toesighoudingsmeganisme, soos beoog in artikels 13(1) en 23(1) van die Wet, na voltooiing van die proses beoog in hierdie regulasie.

Kennisgewing aan Nasionale Tesourie deur Ouditeur-Generaal oor wanbetaling van ouditfooi deur geouditeerde

4. Die Ouditeur-Generaal moet, as 'n geouditeerde versuim om die volle bedrag van die ouditfooi wat deur die Ouditeur-Generaal vasgestel is teen die datum vasgestel deur die Ouditeur-Generaal te betaal, binne 30 dae nadat daardie geouditeerde versuim het om sodanige bedrag te betaal, die Nasionale Tesourie skriftelik van sodanige bedrag in kennis stel, en indien van toepassing, ook die tersaaklike provinsiale tesourie, en die Nasionale Tesourie en die betrokke provinsiale tesourie van enige toepaslike inligting ten opsigte van die aangeleentheid voorsien.

Voorlegging deur Ouditeur-Generaal op tesourie se voorgestelde direktief om ouditfooi vanaf begroting te bestry

5.(1) Indien die Nasionale Tesourie of die tersaaklike provinsiale tesourie, na gelang van die geval, ooreenkomstig artikel 23(5) van die Wet die wenslikheid oorweeg om te gelas dat die ouditfooie verhaalbaar van 'n geouditeerde, anders as 'n nasionale of provinsiale departement, op 'n begrotingspos in die nasionale of provinsiale begroting verhaal moet word, moet daardie tesourie voor uitreiking van so 'n direktief —

- (a) die Ouditeur-Generaal van toepaslike inligting voorsien; en
- (b) die Ouditeur-Generaal uitnoui om voorleggings aangaande die wenslikheid om sodanige direktief uit te reik, te maak.

(2) In die geval dat die Ouditeur-Generaal nie enige voorlegging soos beoog in paragraaf (b) van subregulasie (1) gemaak het nie, kan die tersaaklike tesourie voortgaan met sy oorweging van 'n direktief op die basis dat die Ouditeur-Generaal geen beswaar teen die voorgestelde vasstelling het nie.

(3) In die geval dat 'n tesourie 'n direktief uitreik tot dien effekte dat die betrokke ouditfooie teen 'n begrotingspos in die nasionale of 'n provinsiale begroting bestry moet word, moet daardie tesourie die Ouditeur-Generaal en die geouditeerde onverwyld skriftelik van daardie besluit in kennis stel.

(4) Indien 'n provinsiale tesourie 'n direktief uitreik dat die betrokke ouditfooie teen 'n begrotingspos in 'n provinsiale begroting bestry moet word, moet daardie tesourie onverwyld skriftelik die Nasionale Tesourie en die geouditeerde van daardie besluit in kennis stel.

Kennisgewing aan Ouditeur-Generaal deur Nasionale Tesourie ten opsigte van geouditeerde wat finansiële engte ondervind om ouditfooi-oorskot te betaal

6. Indien die ouditfooie van 'n geouditeerde, anders as 'n departement soos omskryf in artikel 1 van die Wet op Openbare Finansiële Bestuur, 1999 (Wet No. 1 van 1999), een persent van die totale lopende en kapitale besteding van sodanige geouditeerde vir die tersaaklike finansiële jaar oorskry, en die Nasionale Tesourie —

- (a) deur die Ouditeur-Generaal soos beoog in subartikel 23(6)(b)(i) van die Wet geraadpleeg is; en
- (b) van mening is dat die geouditeerde finansiële engte ondervind om sodanige oorskot te betaal,

moet die Nasionale Tesourie ten minste een maand voor die aanvang van 'n finansiële jaar van daardie geouditeerde die Ouditeur-Generaal skriftelik van sy mening ten opsigte van daardie geouditeerde in kennis stel.

Publikasie van ooreenkoms

7. Die Ouditeur-Generaal moet onverwyld na –

- (a) die sluiting van 'n ooreenkoms soos beoog in artikel 23(7)(a) van die Wet ten opsigte van die jaarlikse datum van raadpleging, die vasstelling van kriteria wat toegepas staan te word om te bepaal of 'n geouditeerde finansiële engte ondervind asook die goedkeuring van die proses om 'n skatting van die fondse wat vereis word as 'n regstreekse las vir ouditfoorie te bepaal; of
- (b) die vasstelling deur die toesighoudingsmeganisme gemaak soos beoog in artikel 23(7)(b) van die Wet,

sodanige ooreenkoms, vasstelling of goedkeuring, of enige daaropvolgende wysiging daarvan, vir algemene inligting in die Staatskoerant publiseer.

